

**REGIONAL NEWS UNIT
ALL INDIA RADIO, AGARTALA
Date:07-06-2024
Time: 07.35-07.40 AM Hrs
BENGALI MORNING BULLETIN**

Election Commission :

মুখ্য নির্বাচন কমিশনারের নেতৃত্বে নির্বাচন কমিশনের অন্য দুই সদস্য গতকাল রাষ্ট্রপতি দ্রৌপদী মুর্মুর সঙ্গে সাক্ষাত করে ২০২৪ এর সাধারণ নির্বাচনে নব নির্বাচিত সদস্যদের তালিকার সংকলন রাষ্ট্রপতির হাতে তুলে দেন। নির্বাচন কমিশন গতকাল জানিয়েছে, ২০২৪ এর সাধারণ নির্বাচনে ৬৫.৭৯ শতাংশ ভোট পড়েছে। লাক্ষাদ্বীপে সবচেয়ে বেশি ৮৪ দশমিক ১৬ শতাংশ ভোট পড়েছে। তারপর আসামে ৮১ দশমিক ৫৬ শতাংশ এবং ত্রিপুরায় ৮০ দশমিক ৯৩ শতাংশ ভোট পড়েছে। বিহারে সবচেয়ে কম ৫৬.১৯ শতাংশ ভোট পড়েছে। সাধারণ নির্বাচনের সপ্তম এবং চূড়ান্ত পর্যায়ে সবচেয়ে বেশি ৬৩ দশমিক ৮৮ শতাংশ ভোট পড়েছে।

NDA Meeting :

আগামী রবিবার ৯ই জুন, প্রধানমন্ত্রী নরেন্দ্র মোদির নেতৃত্বে নতুন কেন্দ্রীয় মন্ত্রিসভার শপথ গ্রহণের সম্ভাবনা রয়েছে। সরকার গঠনের লক্ষ্যে এনডিএ তাঁদের প্রস্তুতি চূড়ান্ত করছে। গতকাল নতুন দিল্লিতে বিজেপি সভাপতি জে পি নাড্ডার সভাপতিত্বে এক বৈঠক অনুষ্ঠিত হয়। বৈঠকে কেন্দ্রীয় স্বরাষ্ট্রমন্ত্রী অমিত শাহ,

প্রতিরক্ষামন্ত্রী রাজনাথ সিং, বিজেপির জাতীয় সাধারণ সম্পাদক তরুণ চুগ-সহ অন্যান্য বরিষ্ঠ নেতারা উপস্থিত ছিলেন।

এদিকে, আজ নতুন দিল্লিতে বিজেপি, টিডিপি, জেডিইউ, এল.যে. পি(আর), শিবসেনা(সিন্ধে ফ্রন্টান), জেডি(এস)-এর নবনির্বাচিত সদস্যদের নিয়ে এনডিএ-র সংসদীয় দলের এক বৈঠকের কথা রয়েছে।

Meeting :

ইন্ডিয়া ব্লক নেতৃবৃন্দও গতকাল নতুনদিল্লিতে বৈঠক করেন। তৃণমূল কংগ্রেসের জাতীয় সাধারণ সম্পাদক ও সাংসদ অভিষেক ব্যানার্জি এবং দলের নেতা ডেরেক ও'ব্রায়েন নতুনদিল্লিতে সমাজবাদী পার্টির প্রধান অখিলেশ যাদবের সঙ্গে তাঁর বাসভবনে দেখা করেছেন।

এদিকে, আম আদমি পার্টির নেতা এবং রাজ্যসভার সাংসদ রাঘব চাড্ডা শিব শেনা (ইউবিটি) নেতা সঞ্জয় রাউতের সঙ্গে বৈঠক করেছেন।

New MP Registration :

নবনির্বাচিত সাংসদরা দিল্লি যেতে শুরু করেছেন। লোকসভা সচিবালয় অষ্টাদশ লোকসভার সদস্যদের স্বাগত জানাতে প্রস্তুত। সচিবালয়ের এক বিজ্ঞপ্তিতে জানানো হয়েছে, সময় বাঁচাতে কাগজ বিহীন ডিজিট্যাল পদ্ধতিতে নবনির্বাচিত সদস্যদের নাম একটি সুসংহত ব্যবস্থার মাধ্যমে নথিভুক্ত করা হচ্ছে।

এদিকে, মুখ্যমন্ত্রী অধ্যাপক ডা: মানিক সাহা, সাংসদ বিপ্লব কুমার দেব, সাংসদ কৃতি দেবী দেববর্মন, প্রদেশ বিজেপি সভাপতি রাজীব ভট্টাচার্য ও তিপ্রা মথা প্রধান প্রদ্যোৎ কিশোর দেববর্মা গতকাল নতুন দিল্লি গেছেন।

EC-Gandhiji :

নির্বাচন কমিশন, সদ্যসমাপ্ত অহিংস লোকসভা নির্বাচনকে জাতির জনক মহাত্মা গান্ধীর প্রতি উৎসর্গ করেছে। গতকাল রাজঘাটে গান্ধীজির সমাধিস্থলে শ্রদ্ধার্ঘ্য অর্পণ করে কমিশন এক বিবৃতিতে জানিয়েছে, মহাত্মা গান্ধীর অহিংসার বার্তা, কমিশনের শান্তিপূর্ণ নির্বাচন সম্পন্ন করার অঙ্গীকারকে অনুপ্রেরণা যুগিয়েছে। প্রত্যেক ভারতীয় নাগরিকের ভোটদানের অধিকারকে যেকোন মূল্যে রক্ষা করার জন্য, কমিশন তার যথাসাধ্য চেষ্টা করেছে বলে, ঐ বিবৃতিতে জানানো হয়েছে।

Prasarbharati, Swearing :

তৃতীয়বারের জন্য ভারতের প্রধানমন্ত্রী হিসেবে নরেন্দ্র মোদির শপথগ্রহণ অনুষ্ঠানের আগে, তথ্য ও সম্প্রচার সচিব সঞ্জয় জাজু, প্রসার ভারতীর সিইও গৌরব দ্বিবেদী, আকাশবাণীর মহানির্দেশক মৌসুমী চক্রবর্তী এবং দূরদর্শনের মহানির্দেশক কাঞ্চন প্রসাদ সহ ঊর্ধ্বতন কর্মকর্তারা গতকাল নতুনদিল্লির রাষ্ট্রপতি ভবনে শপথগ্রহণ অনুষ্ঠান পরিচালনা করার জন্য প্রস্তুতি পর্যালোচনা করেন। উল্লেখ্য, এনডিএ সদস্যরা গতকালই

সর্বসম্মতিক্রমে প্রধানমন্ত্রী এবং জোটের নেতা হিসাবে নরেন্দ্র মোদির নাম সমর্থন করেছিলেন।

Health Ministry :

কেন্দ্রীয় স্বাস্থ্য মন্ত্রক গতকাল বিভিন্ন রাজ্যের সঙ্গে তাপপ্রবাহের প্রস্তুতি এবং গ্রীষ্মকালে হাসপাতালে অগ্নিকাণ্ড প্রতিরোধের ব্যবস্থা নিয়ে পর্যালোচনা সভা করেছে। স্বাস্থ্য পরিষেবা অধিদপ্তরের মহাপরিচালক ডাঃ অতুল গোয়েল ভারুয়াল বৈঠকটি পরিচালনা করেন। বৈঠকে জানানো হয় সমস্ত রাজ্য এবং কেন্দ্রশাসিত অঞ্চলগুলির সর্বোচ্চ স্তরের আধিকারিকরা কঠোরভাবে পরিস্থিতি পর্যবেক্ষণ করছেন। তাঁরা অগ্নিকাণ্ডের মতো অপ্রীতিকর ঘটনায় রোগী, কর্মী এবং রোগীকে দেখতে আসা লোকজনদের সরিয়ে নেওয়ার জন্য এসওপি সহ একটি জরুরী প্রতিক্রিয়া পরিকল্পনা তৈরী করেছেন।

H F T :

আন্তর্জাতিক 'লিভারকন' হেপাটাইটিস ফাউন্ডেশন অব ত্রিপুরার উদ্যোগে তিনদিনব্যাপী সপ্তম এইচ এফ টি লিভারকন ও পঞ্চম পদ্মা-গঙ্গা-গোমতী ইন্টারন্যাশনাল লিভার কনফারেন্স আজ থেকে আগরতলায় শুরু হচ্ছে। গতকাল এক সাংবাদিক সম্মেলনে একথা জানিয়েছেন হেপাটাইটিস ফাউন্ডেশন এর প্রতিষ্ঠাতা সভাপতি ডাঃ প্রদীপ ভৌমিক। তিনি বলেন, আজ সন্ধ্যায় হাঁপানিয়াস্থিত ইন্টারন্যাশনাল কনভেনশন সেন্টারে, কনফারেন্সের আনুষ্ঠানিক উদ্বোধন করা হবে। উপস্থিত থাকবেন পর্যটন মন্ত্রী সুশান্ত

চৌধুরী, স্বাস্থ্য সচিব কিরণ গিত্তে সহ দেশ বিদেশের খ্যাতনামা চিকিৎসকগণ।

Drama Workshop-Sabroom :

ন্যাশানাল স্কুল অফ ড্রামার উদ্যোগে দক্ষিণ জেলার সাব্রুমে, ১৯ দিনব্যাপী নাট্য কর্মশালা গতকাল শেষ হয়েছে। কর্মশালার সংযোজক জানান, সাব্রুমের চারটি স্কুলের ৬৮ জন ছাত্রছাত্রী এই কর্মশালায় অংশগ্রহণ করে। গতকাল সাব্রুম টাউন হলে কর্মশালায় অংশ নেওয়া ছেলেমেয়েরা দুইটি নাটক মঞ্চস্থ করে।

Convergence Meeting :

ম্যালেরিয়া, ডেঙ্গু, চিকনগুনিয়া ও জাপানিস এনকফেলাইটিস রোগ প্রতিরোধের লক্ষ্যে গতকাল কৈলাশহরে এক বৈঠক অনুষ্ঠিত হয়। ঊনকোটি জেলার জেলা শাসক দিলীপ কুমার চাকমার পৌরহিত্যে এই বৈঠকে পতঙ্গবাহিত রোগের বিরুদ্ধে আগাম সতর্কতামূলক ব্যবস্থা নেবার কর্মপন্থা স্থির করা হয়। তাছাড়া নানাস্থানে স্বাস্থ্য শিবির করার পাশাপাশি সচেতনতামূলক কর্মসূচি নেওয়া এবং রক্তের নমুনা সংগ্রহ ও রোগ সনাক্তকরণের কাজ আরো সুসংহত করার উদ্যোগ নেওয়া হচ্ছে বলে, শ্রী চাকমা জানান।

Weather :

আজ দুপুর পর্যন্ত আবহাওয়ার পূর্বাভাসে জানানো হয়, আকাশ সাধারণত: মেঘলা থাকবে। বজ্র বিদ্যুৎ সহ বিক্ষিপ্তভাবে হালকা থেকে মাঝারি ধরনের বৃষ্টি হতে পারে। দিনের সর্বোচ্চ তাপমাত্রা থাকবে ৩৪ ডিগ্রির কাছাকাছি। আগরতলায় আজ সকালে সর্বনিম্ন তাপমাত্রা ছিল ২৬.৮ ডিগ্রী সেলসিয়াস। ভোর সাড়ে ৫টা পর্যন্ত বৃষ্টি হয়েছে ১.৮ মিলিমিটার।
